

«Il chantun spetga dapli sustegn da Berna»

Parlament accepta l'incumbensa Michael

■ **(anr/fa) Cun 96:2 vuschs ha il cussegl grond incumbensà il chantun da surpender ils custs per las mesiras da prevenziun cunter donns da gronds animals da rapina. Il chantun fa quint cun ulteriurs custs da 200 000 francs.** L'incumbensa ch'il deputà *Gian Michael* (pbd, Schons) aveva inoltrà il favrer da quest onn pretendeva da la regenza in concept per prevegnir meglier a donns d'animals da rapina. El ed ils 68 deputads che avevan suttascrit l'incumbensa eran da l'avis ch'il chantun duessia s'engaschar tar la confederaziun per ch'ils meds federals concernent ils animals da rapina gronds vegnian augmentads. La regenza aveva acceptà l'incumbensa Michael. Tuttina ha il pur da Donat pretendi mesemna la discussiun.

«Nagin lieu per animals da rapina»

«Jau sun anc adina da l'avis che gronds animals da rapina nun sajan tar nus en Grischun al dretg lieu», ha ditg Gian Michael, «il chantun ha baingea elavurà in concept per proteger las muntaneras, i fa basegn però era autras mesiras, p. ex. finanzas federalas per indemnisar ils purs per ils donns chaschunads da quests animals da rapina.» Da quel avis era er *Alessandro Della Vedova* (pcd, Poschiavo): Ins haja en il Puschlav baingea realisà ils ultims mais blier per proteger las muntaneras e las chamonas d'avieuls e procurà ch'il rument vegnia allontanà en recipients segirs cunter l'urs, ha'l ditg, «tuttina fissi naiv da crair che quai bastia per pussibilitar tar nus la convivenza da l'uman cun l'urs.» Tant el sco era divers represchentants da valladas pauc colonisadas han punctuà ch'i dovria dapli sustegn da

Berna, «a la fin ha Berna prescrit la protecziun da quests animals.» Da quel avis era er la regenza

«Il chantun vul gidar»

«Nus vulain gidar l'agricultura a schliar ils problems ch'ella ha cun quests animals da rapina, era sch'igl è en sazez la confederaziun che stuess vegnir activa causa sia decisiun da proteger cumpletamain il luf, il luf tscherver e l'urs», ha ditg cusseglier guvernativ *Hansjörg Trachsel*. Ins haja da far en connex cun la prevenziun anc blier ed ins haja fatg era sbagls, ha'l admess, «i mancava a

nus simplamain las experienzas cun animals da rapina gronds.» El ha punctuà ch'il rest da la Svizra na possia betg surlaschar als chantuns Grischun e Vallais da chattar sezs soluziuns per schliar il problem cun quests animals. «Perquai vegnin nus ad ans engaschar a Berna per survegnir dapli sustegn finanziar, ultra da quai è però er il chantun sfurzà da metter a disposiziun daplirs daners per quest adiever, p. ex. en furma da credits posteriurs», ha ditg Trachsel. Cun 96:2 vuschs e 4 abstenziuns ha il cussegl grond remess l'incumbensa Michael a la regenza.



Deputà Gian Michael (pbd Schons).